

دارالفنون

حقوق فایز و لایحه محمد قاسم

حقوق ، اقتصادیات

ایکی آبدہ بر نشر اولنور

مندرجات

قسم حقوقی :

اسو مجرہ قانون مدینسنہ نظراً اجارہ حاجی عادل
حق مدافعہ و اصول استنطاق طاہر
آلمان قانون مدینسنہ کورہ وراثت جودت فرید
فرانسدہ شورای دولت وصفی راشد

قسم اقتصادی :

عثمانی بانکہ سی ابراہیم فاضل
دیون عمومیہ یوکنک تخفیفی چارہ لری عینی زادہ حسن تحسین

ا-قانونبول — یکی مطبعہ

۱۹۲۶

عثمانی بانقہ سی

بانقہ لرك اهميتى بڑه آنجق تنظيمان دن (۱۸۳۹) صكره آكلا شيلمغه باشلامشدر .
يالكز بوتاريخه قدر دكل ، حتى بوندن دها چوق صكره لره قدر ايمپراطورلق حسابسز ،
بودجهسز وفكر احتياطدن بسبتون محروم برحاله يشامشدى . بو حالك نتيجه طبعيه سى
اولارق دولت صيق صيق بيوك مالى مضايقه لره دوچار اولور و بر ميراث يدى كې مستقبل
وارداتى يوق بهاسنه قيردير مق مجبوريتنده قاليردى . بو وضعيت مالىه ، بالخاصه قنالغك
كسب اشتداد ايتديكى اون برنجى عصر هجریدن صوكره ، مملكتده دولت و پاشالر
صيرتندن مراجعه ايله كچنير بر صنف مخصوصك تولدينه سيبيت و يرمشدى . تاريخمزد
(غلطه بانكرلىرى) نامنى آلمش اولان بو صنف اكثريا غير مسلم صرافلردن مركبدى .
بو صنف ، اوزون مدت ، تا اداره حميديه نك مبدأنه قدر ، سولوك كې خزينه به ياشمش
و غافل خزينه ده بونلره بوتون قاتنى امديرمشدى .

تنظيمات دولت مالىه سنه ايلك دفعه اوله رق بر انتظام فكرى كتيرومكه چاليشيركن
بانقہ لرك توسطى اولمايجه معاملات اعتباريه نك مملكتده كسب توسع ايدميه جكنى ، ماليات
دولتلك ايسه هيچ بر زمان بانقہسز منتظم برحاله كله ميه جكنى ادراك ايدر كې اولمشدى .
بوفكرى تلقينه اك زياده سائق اولان سبيلردن برى ده ، تنظيمان دن آز صوكره مملكتك
دوچار اولدينى قوائم نقديه بحرانى ايدى . ايلك كاغد پاره نك سوء استعمالى نتيجه سى
اوله رق آوروپا ايله اولان مناسبات خارجيه مزده بويوك قاميو فرقلى حصوله كلكه
باشلامش و شكايات آوازلىرى هر طرفدن عيوقه چيقمشدى . حكومت ، ايلك دفعه
اوله رق ۱۸۴۵ ده آله ثون وبالطه جى نامنده كى ايكي بانكرك تاسيس ايتديكى (استانبول
بانقہ سى) ايله ، قاميو بى مستقر طوتمق مقصدينى استهداف ايدن برائتلاف حصوله كتيرومش
و بو مقصدك تا ميني ايجوك بانقہ سى ايكى مليون غروش بر تضمينات تخصيص ايتمشدى .
استانبولده ايلك منتظم بانقہ بو بانقہ عد اولنه بيلير . بو مؤسسسه دولتلك بتون معاونتنه

رغمًا اساساً باشه چیقارلق ممکن اولمیان بوايشده موفق اولمقدن ماعدا بر چوق حيله ای
آجیولر واسیه کولاسیون معاملاتیه فنا بر شهرت براقش و قریم محاربه سی عرفه سنده
یدی سنه موجودیتدن صوکره محو و مندرس اولمشدی .

ایکنجی دفعه اوله رق دولته صیقی رابطه سی اولاجق بر بانقه تأسیسی ۱۸۵۶ ده ممکن
اولمشدر . بوتاریخلرده آوروپا ایله مناسبات مالیه من توسع ایتمه که قریم محاربه سی وسیله
بزم ایچون استقراضات قبولری آچیلغه باشلامش و مسائل مالیه کیتدکجه دهافضله
بر اهمیت اکتساب ایتمشدی . بزه ایلك استقراضلریمیزی ویرن ایلك شمندوفرلرمزك
انشاسنه توسط ایدن انکلیزلر ، ایلك مهم بانقه نك تشکیلنده توسط ایله مشلر و ۱۸۵۶ ده
انکلیز سرمایه سیله اوتومان بانک Ottoman Bank نامی آلتنده بر بانقه وجوده کتیرمشلردر .
بو بانقه امتیازلی بر شکله تأسس ایتمه مکله برابر دولته صیقی مناسباتی واردی . بعضی
استقراضلرمزه توسط ایتمش و دولته موقت بعضی آوانسلر ویرمشدی . ایشته سکن سنه
صوکره (بانک عثمانی شاهانه) نامی آلتنده تأسس ایدن امتیازلی بانقه بو اوتومان بانک
استحاله سندن حصوله گلشدر .

عثمانی بانقه سی دوغوران احتیاج مناسبات اقتصادی و تجاریه دن زیاده احتیاج دولت ایدی .
آچیلمش اولان استقراضات خارجییه دورنده ، دولت کندیسيله آوروپا سرمایه دارلری
آره سنده متوسطلق رولنی ایفا ایده جك اولان مهم بر بانقه شهیده محتاجدی . بوندن
ماعدا تورکیا کی زراعی و واسع بر مملکتده وارداتک سنه نك هر موسمنده منتظمأ جباتی
ممکن دکلدی . بودجه متوازن بيله اولسه هر موسمنده وارداتک مصارفه کفایت ایتمه سنك
امکانی یوقدی . بر زمانکی کی وارداتی پشیناً ملترملره و صرافلره قیردیرمق دولتک
اعتبارینی محو ایتمک ، وارداتی خراب ایتمک دیمکدی . بونک ایچون هر هانکی بر مؤسسه دن
معتدل فائضله آوانس آلمق ضرورتی واردی . دولتک او زمان حال نقدیسی ده برباد
ایدی . مملکتده مختلف سکه لر و بونک یاننده آریجه قوائم نقدیه تداول ایتمکده ایدی .
بونک اصلاحی منتظم و قوتلی بر مؤسسه مالیه نك وجودینه عرض افتقار ایدیوردی .
بو حقایق آکلایان فؤاد پاشا عثمانی بانقه سنك احداثه چالیشمقله بتون بو وظائفی بانقه یه
ویرمک ایسته مشدی . یالکز ایلك استقراضلرمزدن صوکره فرانسر سرمایه سی مملکتده
دها واسع بررول اوینامغه باشلادیغندن بو بانقه ، اوتومان بانک کی ، یالکز انکلیز سرما-
یه سندن متشکل اوله رق قالماش ، فرانسلرده ایشه قاریشه رق اورتیه انکلیز - فرانسر

سرمایه سندن مرکب بر مؤسسه چیتمشدر . بوتشبه اشتراك ایدنلر پارسك ولوندره نك
اك مهم سرمایه دارلرندن مركب برغرویدی . بونلرك ایچنده ، فرانسه وانكلكره بانقه لری
اسهامنی اللرنده طوتان بانقه لر ومؤسسeler دخی واردی .
عثمانلی بانقه سنك امتیازنامه سی ۴ شباط ۱۸۶۳ تاریخلیدر بوتاریخندن اعتباراً بانقه
مملكتده كیتدكجه متزاید بر نفوذ قزاقمش و ۱۸۷۵ تاریخنده برنجی مقاوله نك وضع ایتدیکی
اساسات امتیازییه یکی و معدل بر مقاوله ایله فوق الحد توسیع اولمشدر . دولتك اجنبی
سرمایه سنه مستند اولان مناسبات مالیه سی اوزرنده بوبانقه نك رولی پك بویوكدر ۱۸۶۳ دن
صوكره کی اكثر استقرضاتمزه بوبانقه توسط ایتمش ، رسوم سته و دیون عمومیه اداره لرینك
تأسسنده دولتك تحویل و توحید دیون معامله لرنده فعالیتك اك بویوك قسمی بو بانقه یه
راجع اولمش ، فرانسز وانكلیز سرمایه سنه استنادایدن شمندوفرلر بوبانقه نك میانجیلنی ایله
وجوده كلشدر . شمندوفرلر مزده جاری اولان كيلومترو تأمیناتی فورمولنی بولان عثمانلی
بانقه سیدر . بانقه یالكز انشآت نافعیه شركت لرینك دكل ، رژی كبی ، دیگر امتیازلی
شركت لرك تأسسنده ده اك فعلی بررول ایفا ایتمشدر . بغداد شمندوفرینك وجوده كله .
سندده بانقه نك بر حصه سی واردر . بر كله ایله بانقه یازیم عصر مدت غرب سرمایه سی ایله
مملكتی كسب اتصال ایتدیرن اك بویوك مؤسسه اولمشدر وبواعتبار ایله اهمیتی الیوم دخی
پك زیاده در . ۱۸۶۳ - ۱۸۷۵ امتیازنامه لری معلوم اولدینی وجهله اخیراً ۲۲ نیسان
۱۳۴۱ (۱۹۲۵) قانونی و اوکا مربوط بولنان ائتلاف نامه لر ایله تعدیل ایدلمشدر .
تعدیلات اخیره نك اسباب وسوائقی اكلاویه بیلمك ایچون اول امرده ۱۸۶۳ و ۱۸۷۵
امتیازنامه لرینه نظراً بانقه نك وضعیتی تدقیق ایتك وبعده یکی وضع اولنان اساسلری مطالعه
ایله مك ایجاب ایدر :

۱۸۶۳ و ۱۸۷۵ مقاولاتنه نظراً

بانقه نك وضعیتی

بانقه نك مدت امتیازی و سرمایه سی :

بانقه نك امتیاز مدتی ۴ اغستوس ۱۸۶۳ تاریخندن اعتباراً الی سنه در انحق ۳۱۲

تاریخی برارادہ سنہ ایلہ بومدت دھا ۱۲ سنہ تمید اولندیغدن امتیاز ۴ اغستوس ۱۹۳۵ سنہ سندہ ختامہ ایرمک لازم کلیدی . بو تاریخک ختامندہ دولت بانکہ قارشو اولان حساب جاریسنی قاپامغه و بانکہدہ بانقوطلرینی آلتون اولهرق تأدیہ ایدوب میدان تداولدن چکمکه مجبور ایدی .

بانقہنک سرمایہ سی ۱۸۷۵ تاریخندہ ۱۰ میلیون انکلیز لیراسنہ ابلاغ ایدلمش اولوب ۳۲۱ یکریمی انکلیز لیرالتی ۵۰۰ بیک سہمدن مرکبدر [*] مع مافیہ بو اسہامک آنجق نصفی تأدیہ ایدلمک مشروط اولدینی جہتلہ تأدیہ ایدلمش اولان سرمایہ مجموعی بش میلیون انکلیز لیراسی وهر سہمک تأدیہ اولونمش مقداری ایسہ اون لیرادر . مبدأ تشکاندہ بانکہنک بوسرمایہ سنک قسم کلینی انکلیزلراندہ ایدی . فقط بو طرز توزع زماناً اساسی بر صورتدہ تحول ایتشدرد . بوکون فرانسزلرک اندہ بولونان تحویلات مقداری بانکہنک سرمایہ سنک اکثریت عظیمہ سنی تشکیل ایتکدہدر . سرمایہ دن غیری اولهرق بانکہ الیوم بوسرمایہنک بر ربغہ مساوی بر احتیاط اچہ سنہ مالکدر .

بانقہنک اداره و مراقبہ سی :

عثمانی بانکہ سنک اداره سی هیچ بر امتیازلی بانکہدہ و حتی هیچ بر آنونیم شرکتدہ کورولمہین بر خصوصیت عرض ایدر . امتیازنامہ یہ نظراً بانکہنک مرکز اداره سی استانبولدہدر . بانکہ بورادہ بولنان بر مدیر عمومی اوچ مدیر و اوچ مجلس اداره اعضاسندن مرکب بر مجلس اداره طرفندن اداره اولنور . لکن بانکہنک حقیقی مجلس اداره سی بو مجلس دکلدرد . حقیقی مجلس اداره بری پارس دیکری لوندرہدہ بولنان و اوئر اعضادن مرکب اولان ایکی قومیتہدر . بووضعیت یالکز فعلی بروضعیت اولمایوب امتیازنامہ ایلدہ مؤیددر . فی الحقیقہ امتیازنامہنک یدنجی مادہ سی بانکہنک بوتون دیرہ کتیولرینی اوروپادہ مقیم قومیتہ لردن آله جغنی صراحة قبول ایتکدہدر . بو قومیتہ لری انتخاب ایدن آقسیونہ لرلر ہیئت عمومیہ سیدر . بانکہ یہ متدائر مسائل حقندہ ایکی قومیتہ آری آری اتخاذ مقررات ایدر . امتیازنامہدہ هیچ بر صراحت اولماقلہ برابر تورکیادہ بولنان شعباتک اداره سی بوکون فعلاً بالخاصہ پارس قومیتہ سنہ مودوع بولونمقدہدر . بانکہنک مصر و قبریسدہ کی شعباتی ایسہ دیرہ کتیولرینی

[*] ۱۸۶۳ دن ۱۸۷۵ تاریخنہ قدر سرمایہ موضوع ۲,۰۲۵,۰۰۰ انکلیز لیراسی ایدی بو تاریخندہ دھا ۲۹۷,۵۰۰ آقسیون چیقاریلهرق موضوع سرمایہ بش میلیون انکلیزہ ابلاغ ایدلشدرد .

دها زیاده لوندره قومیه سندن آلمقده در . ۱۸۷۵ تاریخنده ویا نه پیاسه سنی ده مملکت مزله علاقده دار قیلمق ایچون بوراده ده آلتی کشیک بر قومیه تأسیسی قرار گیر اولمشسده ، تشبیه اشتراک ایده جک اولان اوستریا - عثمانی بانکه سنک ، بوتاریخده اوستریا پیاسه سنی صارصان بر بحران نتیجه سنده ، انفساخ و عثمانی بانکه سی تشکیلاتنه داخل اولماسی اوزرینه بو قومیه هیچ بر زمان تشکل ایتمه مشدر .

ایسته استانبول مجلس اداره سی ، مدیر عمومی ، مدیر عمومی معاونی و مدیران ایله اوچ اعضا ، بوضو رتله اوروپا قومیه لری طرفندن انتخاب اولونمقده در . امتیازنامه ده بو اوچ اعضا نك حكومتله بالائتلاف استانبول تجار و بانکرلری میانندن انتخاب ایدیه جکی تصریح ایدلمکده ایسه ده مشروطیتدن صو کره بونلرک حکومتجه ارا نه سی و تورک اولماسی اساسی فعلاً تقرر ایتمشدر . مع مافیه حتی یالکز تورکیاده بولتان شعبانك قومیه لردن آلنه جق دیره کتیلر دائره سنده اولسون اداره سی خصوصنده بیله استانبول مجلس اداره سنه هیچ بر نفوذ ویرله مشدر . بانکه استانبولده فعلاً یالکز هیئت مدیران طرفندن اداره اولونمقده و حتی تالی نقاطه قدر قومیه لردن تعالیمات المقسزین بر شی یاپه مامقده در .

حکومت بانکه یی نزدنده بولوندر دینی بر ناظر Haut Commissaire - که بو کون بوکا ساده جه قومیسر دینیور - معرفتیه مراقبه ایدر . قومیسر بانکه نك اداره سی حقنده اخذ معلومات ایتک و امتیازنامه نظامات و مقررات احکامنه بانکه جه تماماً رعایت اولونمسنه نظارت ایله مکله مکلفدر . قومیسر بانکه حصه داران و مجلس اداره اجتماعاتنده بولونمق صلاحیتنه مالکدر . بانقو طر اوزرنده ناظرک امضاسی بولوندیگی کی بانکه نك خزینه ایله اولان بالجله مناسبانه کنیدیسی نظارت ایدر . مع مافیه هیچ بر حالده قومیسرک بانکه نك امر اداره سنه مداخله ایتک صلاحیتی یوقدر .

بانقو طر امتیازی :

حکومتک بانکه یه بخش ایتدیگی اک اساسی صلاحیت بانقو طر امتیازیدر . دولت بو حتی عثمانی بانکه سندن باشقه هیچ بر بانکه یه ویرمه کی تعهد ایتدیگی کی کنیدیسی ده کاغد یاره اخراج ایله مه کی قبول ایتش بولونیوردی . بانکه چیقاره جفی بانقو طری ایلك طلبده آلتون اوله رق تأدییه مجبوردر ، شوقدر وار که حقوقاً هر بانقو طر آنجق چیقیدیگی شعبه ده قابل طلب اولوب شعبه لرک بانقو طرینک استانبولده تأدییه سی ، بانکه نك اختیارینه واستانبولده

چیقان بانقوطلرك طشره شعبه لرندۀ تأدیہ سی بانقہ نك وضع ایدہ جکی شرائطہ تابعدر . بانقوطلر تأدیاتی خصوصندہ مشکل بر موقعدہ قالماق ایچون بانقہ نك امتیازنامہ یه قویدور دینی بومادہ لره بانقہ حقیقت حالده هیچ بر زمان مراجعتہ مجبور قالماش و بانقوطلرینی یالکز مرکزده اخراج ایدہ رك ہرہانکی شعبہ ده اولورسہ اولسون تأدیہ ایتدیرمشدر . بانقوطلر بانقہ شعبہ سی بولونان ہر شہردہ تداول قانونی Cours légal حقنی حائر در یعنی تداولدہ قبولی مجبوریدر . مبدأ امتیازدن اعتباراً ایلك ایکی سنہ ظرفندہ بانقہ قاصہ لرندہ تأمینات اولہرق ۵۰٪ واوندن صکرہ برثلث رادہ سندہ نقد معدنی بولندیرمق مجبوری تی واردر . حقیقت حالده بانقہ بوخصوصده هیچ بر زمان مشکل موقعدہ قالماش و ہماندہ دائماً قاصہ سندہ میدان تداولدہ کی بانقوطلندن فضلہ آلتون بولونمشدر . بودہ مملکتدہ اعتبار مفہومنك توسع ایدہ مہ مسندن و آناطولونك حرب عمومی یه قدر بانقوطلدن احتراز ایتش بولونمشندن متولددر .

حرب عمومینك فرداسندہ حکومت بانقوطلرہ تداول مجبوری Cours forcé قوتی بخش ایتش بانقوطلرك اوزمانہ قدر نادراً ۱,۵ میلیون لیرایہ چیقان مقداری آحقق بوندن صوکرہ دہا فضلہ مقدارہ بالغ اولمشدر . مع مافیہ بانقہ بالا خرہ امتیاز مدتك ختامہ یا قلاشدقہ آلتون اولہرق اعادیہ مجبور قالماق ایچون بانقوطلرینی یاواش یاواش پیاسہ دن چکمشدر . ۱۹۲۵ سنہ سی نیسانندہ بانقہ نك میدان تداولدہ بولونان بانقو- طلرینك مقداری ۸۹۱,۴۷۵ لیرادن فضلہ دکلدی .

دولت بانکرلکی صلاحتی و بانقہ نك دولتہ اولادہ مناسباتی :

بانقوطلر امتیازندن غیری اولہرق بانقہ یه بخش ایدیلن اك بویوك صلاحیت بر کله ایلہ دولت بانکرلکی صلاحیتی در . بوصلاحیت امتیازنامہ ده غایت واسع طوتولمشدر . امتیازنامہ اساسینك ۱۳نجی مادہ سندہ بانقہ نك دولت خزینہ داری اولہجنی صراحۃً مذکور اولوب بوبادہ امتیازنامہ یه مربوط بر نظامنامہ بیلہ وجودہ کتیرلشددر . بومادہ موجبجہ حکومت بالجملہ وارداتی بوبانقہ شعبہ لرینہ تودیع ایدہ جك و بالجملہ مصارف دولت كرك داخل و كرك خارج مملکتدہ بوبانقہ طرفندن ، بودجہ نك حدود و تخصیصاتی دائرہ سندہ ، تسویہ ایدیہ جکدر . بوصورتلہ بانقہ نك دولتك محاسب مسئول یکانہ سی رولنی احراز ایتسی لازم کلیوردی . امتیازنامہ نك یدنجی مادہ سی بانقہ نك بودجہ قومیسوینہ بر اعضا کوندرہ رك تمثیل ایدیہ جکی

ودولتک بانکہ نزدینہ برحساب تعیین ایدہ رک حساب جاریسی قونترول ایدہ جگنی صراحة ذکر ایتکده در .

امتیازنامہ نک خزینہ معاملاتنہ دائر اولان بواحکامی هیچ برزمان تطبیق اولونماشدر . اداره عزیزیہ وحیدیه بیلہ دولتک بوتون واردات ومصارفک بوصورتلہ قونترولنی اجنبی واکثریا سرمایہ نک منسوب اولدینی دولتردن دیرکتیف آلان برمؤسسہ نک الہ تودیع ایدہ مہ مشدر . اساساً اودورده بودجه نک عدم موجودیتی بو ماده لرک تطبیقنی امکانسر قلمشدر . مشروطیتدن صوکرہ اوروپادن مشاور اولہرق کتیریلن موسیو لوران بانکہ نک امتیازنامہ سندہ مذکور اولان بومادہ لرک اساساتی احیا وموقع تطبیقہ وضع ایچون برپروژہ وجودہ کتیرمش وبپروژہ مجلسہ تودیع اولنمشسده قوانین مالیه قومیسسیونی طرفندن رد اولنمشدر . امتیازلی بانکہ بو صورتلہ تماماً اجنبی سرمایہ سیلہ متشکل و اجنبی نفوذی آلتندہ اولدجہ خزینہ معاملاتنک بانکہ یہ تودیع ایدیلہ مہ مسی غایت طبعیدر .

خزینہ معاملہ سی خارجندہ اولہرق بانکہ ایلہ دولتک مناسباتی بروجہ آتی ایدی :

۱ بانکہ داخل وخارج عملکنندہ دولتک بالجلہ استقرضاتنہ توسط ایدہ جکدر . بوخصوصہ حکومت دیگر مؤسسہ لرده مراجعت ایدہ بیلیرسده شرائط متساویہ داخلندہ عثمانلی بانکہ سی ترجیح ایدیلہ جکدر .

۲ بانکہ دولتک بالجلہ نقل نقود و خزینہ بونولری معاملاتنہ قومیسسیون مقابلندہ توسط ایدر .

۳ بانکہ دولته معین مقدارده وهر آلتی سندہ برکرہ مقدار وفائضی بالائتلاف تثبیت ایدلمک اوزرہ برحساب جاری آچغہ مجبوردر .

۴ بانکہ آچہ جنی ایلک اون شعبہ ایچون دولتن شعبہ لر اکرامیہ سی نامیلہ معین برتخصیصات آلیر . بالادہ کی مناسباتک شرائطی ہر آلتی سندہ بر عقد ایدیلن مذیل مقالہ نامہ لر تعیین ایتکده اولوب بونلرک اک صوکنجیسی ۱ شباط ۱۹۱۱ تاریخندہ جاوید بکلہ موسیو رووال آرہ سندہ عقد ایدلمشدر . بو مقالہ نامہ بوندن اولکیلرہ نظراً دولت لمنہ اولہرق مهم تعدیلاتی حاویدر .

۱ بومقالہ نامہ آوانس مقدارینی ۱,۵ میلیون لیرا اولہرق تثبیت ایتمشدر . بو آوانسک فائضی $\frac{1}{4}\%$ اولوب حساب جاریدہ دولتک آلہ جنی اولورسہ بانکہ $\frac{2}{3}\%$ فائض ویرہ جکدر .

امتیازنامه اساسیده بومقدار ۲,۷۰۰,۰۰۰ استرلین ایدی فقط دولت بونک مقابلنده بانقهیه دولت تحویلاتی ویرمکه مجبور طوتیلوردی بو مقاولهده بو نقطه قالدیرلقدن ماغدا فائضی ده ۸٪ دن ۵٪ مقدارینه ایندیرلشدر .

۲ بانقهنک هرهانکی بر شعبه سنه یاتیرلش اولان بر پاره نك درحال اوکونک تاریخیه خزینه حسابنه کچیرلسی و دولته ایسته دیکی محله قابل تأدیه اولسی قبول ایدلشدر .

۳ دولت نقل نقود معامله سی ایچون بوندن اولکی مقاوله لرده مقطوعاً بانقهیه ۵۰ بیک لیرا ویرمکه مجبور دی . بومبلغ بومقاوله ایله ۴۰ بیک لیرایه تنزیل ایدلشدر .

۴ شعبه لر اکرامیه سی نامیله دولتك ایلک اون شعبه ایچون ویرمکه مجبور اولدینی مقطوع اکرامیه نك مقداری ۵۰ بیک لیرادن تدریجاً ۳۳ بیک لیرایه تنزیل اولونمشدی . بویکی مقاوله ایله بومقدار ۲۰ بیک لیرایه ایندیرلش فقط بر سابق هر یکی شعبه ایچون سنوی ایریجه ۲,۵۰۰ لیرا ویرلسی قبول ایدلشدر . بو اکرامیه نك یکونی هیچ بر زمان سنوی ۵۰ بیک لیرایه کچه مز . بانقه ایریجه بو تاریخده مختلف محلرده بلا تضمینات ۱۲ شعبه آچنی تعهد ایتشدر .

حربك عرفه سنده بانقهنك تورکیا داخلنده کی عموم شعبه لری ۴۰ قدردی ممالک اجنبیه ده قرق قدر شعبه سی موجود اولوب بو صورته مجموعی (۸۰) ه بالغ اولمده ایدی . بانقه و شعبه لری بالجمله رسوم و تکالیفدن معاف اولدینی کبی اسهام و تحویلاتی حواله نامه لری حواله مکتوبلری و چکلری دخی رسومه تابع دکلدر .

بانقه معاملاتی و بانقنرط امتیازی :

عثمانی بانقه سی اساس اعتباریله بر تودیعات بانقه سی اولوب ، تودیعات قبولی ، اسقونطو ، قیم منقوله ، امتعه و حساب جاری اوزرینه اقراضات و سائر بونوع بانقهنرک یاپدینی بالجمله معاملاتی یایمق و حتی دیلر سه املاک و صنایع بانقه سی رولنی ایفا ایتک حق و صلاحیتی حائزدر . مع مافیه بانقه عمومیتله تودیعات بانقه سی اموردن دیشاریه چیقما مقده در .

بانقهنك معاملات تجاریه سی جقمده بر فکر ایدینك ایچون ۱۹۲۴ سنه سی بیلانچوسی بوجه آتی درج اولونمشدر :

دیونات

مطلوبات و موجودات

پنس شیلین	استرلین	پنس شیلین	استرلین
سرمایه (تأدیه ایدیان قسم)	۵۰۰۰۰۰۰	۳۲۹۸۹۵۲	۷
احتیاط آخه سی	۱۲۵۰۰۰۰	۱۳۳۲۱۳۹	۱۴ ۷
تداوله موجود بانقنوط	۷۸۰۲۶۶	۷۸۴۴۸۸۲	۱۰ ۶
مقداری		۴-۳-۳۶,۹۳۳	
دین سنداتی	۱۰۵۱۷۷۳	استرلینی فرانسز و انکلیز	
آله جقلی حساب جاریلر	۱۲۷۱۲۱۴۰	خزینہ بنوسیدر	
وعده لی مودوعات	۱۲۷۸۱۰۴	اسهام و تحویلات جزدانی	۲۵۸۰۴۴۳ ۱۳ ۳
کار و ضرر حسابی	۳۲۶۹۵۱	(بونک ۱-۳۸۶۱,۰۶۹)	
		استرلینی فرانسز و انکلیز	
		دولت اسهامیدر	
		حساب جاری اوزرینہ	۴۱۴۳۱۶۰ ۵ ۹
		اقراضات	
		رهن اوزرینہ اقرضات	۲۷۲۸۲۹۳ ۱۴ ۱
		اموال غیر منقولہ و موبلہ	۴۸۱۳۷۴ ۱۰ ۴
یکون	۲۲۴۰۹۲۳۶ ۸ ۱۰	یکون	۲۲۴۰۹۲۳۶ ۸ ۱۰

بویالانجو بانکہ یہ واقع اولان مودوعاتک ۱۴ میلیون استرلین لیراسنی متجاوز اولدیغنی
 کوستر مکده اولدیغنی کبی اقرضاتنک ده مجموعاً ۱۹ میلیون استرلینہ قریب اولدیغنی ارانہ
 ایتمکده در . بانکہ نک بومعاملاتنک سنہ دن سنہ واسع نسبتده توسع ایتدیکنہ هیچ شہہ
 یوقدر . مودوعاتہ عطف نظر ایدہ جک اولورسہ ق ۱۸۶۳ ده ۳۰۵۰۰۰۰ استرلیندن
 ۱۸۷۸ ده ۲,۵ میلیون ، ۱۸۸۸ ده تقریباً ۳,۲۵۰,۰۰۰ ، ۱۸۹۸ ده ۶,۸۳۹,۰۰۰ ،
 ۱۹۰۳ ده ۹ و ۱۹۰۸ ده ۱۰ میلیونہ کچمہ سی و ۱۹۲۴ ده ۱۳ میلیونہ قریب بولماسی
 بویابده کی توسع حقندہ بر فکر ویرہ بیلیر . کذا دین سنداتی مقداری ۱۸۷۸ ده
 ۵۳۸,۰۰۰ ، ۱۸۸۳ ده ۸۶۰,۰۰۰ ، ۱۸۸۸ ده ۲,۰۰۰,۰۰۰ ، ۱۹۰۸ ده ۳,۰۰۰,۰۰۰ ،
 و ۱۹۲۴ ده ایسہ ۷,۸۴۴,۰۰۰ اولماسی بوتزایدی بارز بر صورتده کوستر . بانکہ نک
 موقع تجاریسنک کون کچدکجہ صاغلانلاشدیغنه و دولت معاملاتی ایله تجاری معاملات
 آراسنده کی نسبتک معاملات تجاریہ لہنہ تبدل ایتدیکی شہہ سزدر . بانکہ بوکون ملکندہ
 هیچ بر بانکہ ایله قابل قیاس اولمہ جق درجہ ده صاغلان بر موقعی حائر در .

بونکہ برابر بالادہ کی بیلانچو و ارقامک بانقہنک مملکتدہ معاملات تجاریہ سنک درجہ سنی قطعاً انعکاس ایتدیرہ مدیکنی ده نظر دقتدن دور طوتمامالی یز . اشبو پیلانچو و ارقام یالکز مملکتمزده کی معاملات کی کوستر مه مکده بلکهده عثمانی بانقہ سنک تورکیاده ، مصر ، فلسطین ، عراق ، ایران ، سوریه ، لبنان و یونانستان ایله فرانسه وانکلتزده بولان بوتون شعبه لرینک معاملات عمومیه سنی کوستر مه مکده در . بناءً علیہ بو پیلانچو ایله بانقہنک مملکتدہ کی وضعیت تجاریہ سنی آکلامق امکانی یوقدر . بانقہنک عمومی پیلانچوسی یاننده مملکتدہ کی شعبه لرینک احوال مالیه سنی کوستریر بریلانچو نشر ایتمه سی شایان تمیدر . آنجق اوزمان مملکتدہ کی مودو عالتک مقداری واقراضاتک درجہ سی حقده صحیح برفکر ایدینلمک ممکن اولاجقدر . [*]

۱۹۲۵ قانونی وارلا مربوط ائتلافنامه لرنک وضع ایتدیکی اعظم مجبرده

عثمانی بانقہ سنک اسکی امتیازنامه لرینک احکام اساسیه سنک نه درجہ واسع اولدینی یوقاریده کی ایضاحات ایله مستبان اولشددر . بو مقاولاتک دولت و بانقہ مناسبات مالیه سنه دائر اولان احکامی بالخاصه فوق العاده کنیش طوتولشدی . امتیازی بانقہلر ایچنده انکلتزه و بلجیکا بانقہ سی کی غایت واسع صلاحیت مالک بانقہلر دخی داخل اولدینی حالده مقاوله عثمانی بانقہ سی قدر واسع صلاحیتی حائر هیچ بر بانقہ یوقدر دینله بیلیر .

فی الحقیقه بو امتیازنامه لر ، یوقاریده کورولدیکی کی ، بالجله دولت وارداتنک بانقہیه تودیعنی ؛ و مصارفکده ، بودجهیه مطابقتی کنیدیسی طرفندن قونترول ایدلمک شرطیه ، ینه بانقہ طرفندن تسویه سنی آمر بولنمقده و بوغایه یی تأمین ایچون بودجهنک بانقہیه تبلیغی مجبوریتنی وضع ایتک ایدی . حتی ده ایلری کیدیلهرک بر ماده ایله بودجه قومیسویننده بانقہنک برمثلی بولنسی دولتک بانقہنک مساعده سی اولقسزین کاغد پاره چیقارامامسی کی غریب و یالکز مقاوله نک عقدی زماننده معلون اولمایان حاکمیت ملیه مفهومه دکل عینی زمانده دولت مفهومه ده مخالف بر ماده موجوددی . کرچه خزینه دارلق حقده موجود اولان بوقیود فعلیاتده هیچ بر زمان تطبیق اولنما مشدی لکن جمهوریت احکامی فعلیات

[*] ۱۹۲۵ ائتلافنامه سنده بانقہنک کنیدیسنه واقع اوله جق تودیعاتی اجنبی قامیوسنه یا تیرمانی تعهد ایتمه سی ده بولزومی تأیید ایتکده در . بانقہنک مملکت تودیعاتی و مملکتدہ واقع اولان آوانسلیری مختوی اولق اوزره نشر ایده جکی تورک پاراسنه مستند پیلانچولر بوبابده هرکسه اک صحیح برفکر ویره جک و واقع اولان صرخ و یا ضمنی اعتراضاته سد چکه جکدر .

ایله منسوخ اولسه دنخی جمهوریت تشکیلات و قوانین اساسیه سیله طبان طبانه ضد بولونان بوا حکامی سکوت ایله کچیشدیرمکه راضی اولامازدی . ایشته بونک ایچوندرکه مالیه مجلسی و کیلی عبدالحالق بکله بانکه مدیر عمومیه سی موسیو استغ طرفندن بانکه نك مدت امتیازیه سنک ۱ مارت ۱۹۳۵ تاریخچه قدر تمدیدی شرائطی احتوا ایدن ۱۰ مارت ۳۴۰ واونک ذیلی بولان ۲۱ مارت ۳۴۱ تاریخلی ایکی ائتلافنامه یی ۲۲ نیسان سنه ۳۴۱-۹۲۵ واونک قانون ایله تصدیق ایدرکن [*] (۱۰ مارت ۱۳۲۰ تاریخلی ائتلافنامه نك ۱۲ نجی ماده سنده مرعیتی تأیید اولونان امتیازنامه و مقاولات سابقه موادی . یاننده تورکیا جمهوریت نك تشکیلات و قوانین اساسیه سی احکامته مخالف اولان ۱۲۷۹ تاریخلی امتیازنامه نك ۱۲ نجی و ۱۲۹۰ تاریخلی مقاوله نامه نك ۱۳ نجی و ۱۴ نجی ماده لری و كذلك ذکر اولونان ۱۹۲۰ تاریخلی مقاوله نامه نك ۳ نجی و ۷ نجی ماده لرینک اساسات مبحوثیه منافی مندرجاتی صراحة برطرف ایدمک شرطیه) قیدینی قویقه مجبور اولمشدر .

بوقید احترازی موجبجه :

۱ — دولتک امتیاز مدتجه کاغد پاره اخراج اتمه سی و عینی امتیازی حائر دیکر بر بانکه و یا مؤسسه یه بو حق و برمه سی منع ایدن ماده (۱۲۷۹-۱۸۶۳) امتیازنامه سنک ۱۲ نجی ماده سی) .

۲ — بانکه نك دولت خزینه داری اوله جفی ، بالجمله وارداتک کنديسنه تودیع و مصارفک کندي واسطه سیله تسویه ایدیه جکی ، بودجه نك کنديسنه تبلیغ و مراقبه سنک کنديسی طرفندن اجرا اولونه جفی ، و دیون عمومیه مرتباتنک تأمین تسویه سنه نظارت ایدیه جکی حقنده کی ماده (۱۲۹۰-۱۸۷۵) مقاوله سنک ۱۳ نجی ماده سی) .

۳ — خزینه بونولرینک منحصرأ بانکه نك توسطیه میدانه چیقاریله جفی ، اخراجاتک برقانون مخصوصه مستنداولاجفی ، حقنده کی ماده (۱۸۷۵) مقاوله سی ماده ۱۴) [*] .

۴ — بانکه قومیسرینک بانکه مجلس اداره سی و قومیته لرله ائتلافدن صکره تعیین ایدیه جکی ، بانکه نك بودجه قومیسرینک مجلس اداره اعضاسی و یا دیرکتورلرندن بری طرفندن تمثیل ایدیه جکی حقنده کی فقره لر (۱۸۷۵) مقاوله سنک ۳ نجی و ۷ نجی ماده لرنده کی فقرات) .

[*] « ... بونوک ملت مجلسی انحصار و مالی تعهدی متضمن مقاولات و امتیازاتک تصدیق و فسخی کی وظائفی بالذات ایفا ایدر ... » تشکیلات اساسیه قانونی ماده ۲۶ .

[**] بوماده نك قسم متباقیسی بانکه حساب جاریسنه ، قومیسرون مقدارینه ، شعبه لرا کرامیه سنه ، متناثردر . متوالی ائتلافات مخصوصه ایله بونلرک مقداری دکیشدیرلدیکی کی صوک ائتلافنامه ایله آئیده کوروله جکی کی یکی اساسات وضع اولونمشدر .

صریحاً رفع والغا اولونمش واسکی امتیازنامه لرك احکان سائرهمسی ابقا ایدلمشدر .
 بونلر خارجنده اولارق ائتلافنامه لرله یاپیلان تعدیلات و وضع اولنان احکامه کلنجه
 بونلری بری دولت بانکرلککه ایکنجیسی بانقوطة متدائر اولق اوزره ایکی قسمه آیره بیلیرز .

۱ — عثمانلی بانقه سی دولته ۵ میلیون و زراعت بانقه سنه ۳ میلیون لیرالق بر حساب
 جاری آچنی تعهد ایتکده در . حساب جارینک حکومت آچیله جق قسمتک نصفی یوم
 اقراضده کی پیاسه رایجی اوزرندن انکلیز لیراسی اوله رق تأدیه ایدیله جک و حکومتجه ده
 ینه انکلیز لیراسی اوله رق اعاده اولونه جقدر . حساب جارینک فائضی $\frac{5}{100}$ الی ۷ اولاجق
 و هر اوج سنه ده بر ائتلافات مخصوصه ایله یکیدن تثبیت ایدیله جکدر . مقیاس مسکوکاتک
 آلتون اساسنه ارجاعی حالنده بو آوانس مقداری طرفینجه بالا ائتلاف یکیدن تقریر ایتدیریله جکدر .

۲ — بالاده محرر ۱۹۱۱ تاریخلی ائتلافنامه موجبجه نقل نقود معامله سی ایچون
 بانقه یه مقطوعاً ویریلن ۴۰ بیک وشعبه لر اکرامیه سی نامیله ویریلن ۲۰ بیک لیرا قومیسون
 واکرامیه الغا ایدلمشدر . بانقه فی مابعد ختام امتیازه قدر دولتک نقل نقود معاملاتی مجاناً
 ایفا ایدله جک وشعبه لر اکرامیه سی نامی آلتنده دولتن هیچ برشی طلب ایلیه جکدر .

۳ — حرب عمومی ائناسنده قیادلمش اولان عثمانلی بانقه سی شعبه لری ۱۹۲۶ ایلوله
 قدر یا اسکی یرلرنده ویا مالیه وکیلنک تنسیب ایدله جکی دیگر ولایت مرکز لرنده یکیدن
 کشاد ایدیله جکدر . آریجه بانقه شعبه سی بولونمیان یرلرده بر مخارجه احتیاج حاصل اولدیغی
 تقدیرده بو وظیفه بانقه جه زراعت بانقه سی شعبه لرینه ویریله جکدر .

۴ — دولت بانکرلکی ایجاباتندن اولق اوزره ، عثمانلی بانقه سنک مدیر عمومیسنک
 آتیا وقوع بولاجق ایلک تبدلندن اعتباراً ، مدیر عمومی تعیینده مالیه وکیلنک رأیی استعراج
 ایدیله جکدر . استابول مجلس اداره سنده بولوناجق اوج ترک اعضا مالیه وکیلی طرفندن
 تنظیم اولونه جق آلتی کشیلک ایسته اوزرندن بانقه جه انتخاب ایدیله جک وبواعضانک مدت
 ماموریتی اوج سنه دوام ایلیه جکدر .

۵ — بانقه تورکیاده کی معاملاته دائر اولان دفاتری تورکجه اولارق طوتاجق
 وارزو ایتدیکی تقدیرده فرانسزجه دخی حساب طوتابیله جکدر . بانقه نک مأموریتنک
 لااقل $\frac{60}{100}$ ی تورک مسلمان اولاجق و بونلره ویریله جک معاشات یکونی مدیر عمومی
 ومعاون معاشلری داخل اولمدیغی حالده بوتون بانقه معاشاتنک $\frac{40}{100}$ ندن دون اولیه جقدر .
 دفترلری تورکجه اولارق طوتمق ایچون برسنه ، بانقه اداره سی بالاده کی شرائط داخلنده

توركشديرمك ايچون بش سنه مهلت ویرلمشدر . آریجه مسلكده اختصاص كسب ايتك اوزره بانقه طرفدن ممالك اجنبیه ستاز يامق اوزره تورك مسلمانلردن مأمور نامزدلری اعزام ایديله جك وبونلرك عددی دائمی صورتده ۱۰ دن دون اولیه جقدر . بواحكامك تورك عنصري بانقه جيلغه آلیشديرمق ايچون بك بويوك براهمیتی واردر .

۶ - نهایت بانقه دولت بانقه سی صفتيله كنديسنه واقع اولاجق تورك پاره سی مودوعاتی كندی نام وحسابنه اجنبی آچه سنه تحویل ایتمه مکی وسرمایه سنده ۵۰۰ بيك لیراسی توركياده کی معاملاتنه تخصیص وانكلیز لیراسی اولارق استعمال ايله مکی تعهد ایتكده در . بواحكامك اهمیتی درجه تالیده ايسه ده قامیو معاملاتنه و پاره مزك قیمتك استقرارینه فائده سی اولاجفی ملاحظه سنه بناء وضع ایتدیرلمشدر .

شایان دقت اولان برنقطه ده دولتك غیر مشغول نقودینی مطلقا عثمانلی بانقه سنه ویرمك حقه ده کی مقاولات سابقه ده موجود اولان قیودك (۱۸۷۵) مقاوله سنك ۱۳ و ۱۴ نجی ماده لری) بوصول قانون ائتلافامه لرایله الفا ایدلمش اولمیشدر . یکی ملی بانقه لرك تشكیل ایتكده اولدینی بر دورده ده دولت وتودیعاندن بونلری ده استفاده ایتدیرمك مطلوب اولدینی جهتله حكومت بوبابده هیچ بر مجبوری ائنه كیرمك ایسته مه مش عثمانلی بانقه سی ایچون یالکزر دولتك معاملات نقدیه سنه یعنی نقل نقود معاملاتنه منحصرأ توسط ایتك حقی طانمشدر . بانقه یه مملكتك داخلنده بعضیلری ضررله ایشله یین و صرف معاملات رسمیه ایچون متأسس بولونان ۴۰ قدر شعبه ادامه ایتدیرمك مجبوری تحمیل اولوندقدن صكره بوحقی طانیق غایت طبعیدر . اساساً بانقه بو خدمتی مجاناً ایفا ایتكی متعهد بولنمقده اولدینی کی بونی مملكتده اك ای صورتده ایفا ایده بیله جك اولان مؤسسه نك ده عثمانلی بانقه سی اولدیغنده شبهه یوقدر . ۱۸۷۵ مقاوله سنك الفا ایدلمه مش بولونان ۱۵ نجی ماده سنك بانقه نك مملكتك داخل وخارجنده دولتك معاملات مالیه سنه توسط ایده جكنی تصریح ایتكده بولوندیغی ده آریجه شایان ذكر در . بانقوت حقه ده یکی ائتلافامه ايله وضع اولونان اساساته كلنجه : بونی بر قسمی دولتك دیکری بانقه نك لهنه اولمق اوزره ایکی یه آیره بیلیرز .

۱ - شمدی یه قدر دولت بانقوت اوزرندن هیچ بر عائدات آلمدیغی حالده فی مابعد آچقندن یعنی قاصده موجود تأمیناندن فضله اخراج ایديله جك قسم اوزرندن دولته سنوی ۳ میلیون لیرایه قدر ۱,۵٪ واوندن فضله سی ایچون ۲٪ راده سنده بر عائدات سنویه تأدییه ایدلك مجبوری واردر . بوندن مقصد دیکر بعض مملكتلرده اولدینی کی بانقوت

کارندن دولته بر حصہ تفریق ایتدیر مکدر . چونکہ معلوم اولدینی وجهله بانقنوط امتیازی بانقہ ایچون فائضسز برپاره تدارک ایتک دیمکدر . بانقہ بوصورتله آچیقدن اخراج ایتدیکی بو بانقنوطلری فائضله اقراض ایدرک بر کار تأمین ایلدکددر بو انحصار بر قانونله حصوله کلش اولدیغدن دولتک بوندن کندیسسی ایچون بر منفعت مخصوصه تأمین ایتک ایستهمسی غایت طبیعیدر .

۲ — مدت امتیازیه ختامنده کرک اولجه اخراج ایدلش و کرک ائتلافنامه دن صکره اخراج ایدیله جک اولان بانقنوط بدلرینک آلتونله تأدییه سی ایچون وقوع بولاجق دعوتیه اجابت ایتمین حاملره عائد اولوب وقانوناً ابطال ایدیله جک اولان بانقنوطلرک بدلی خزینیه ایراد قید اولونه جقددر .

بو ماده دن مقصد فرانسه ده وسائر بر چوق مملکتلرده اولدینی کی یانان محو اولان دکره دوشن ویا هر هانکی بر سیددن دولای ابراز اولونامیان بانقنوطلرک مقابلنک ختام امتیازده دولته مال ایدلمه سیدر . شمدیه قدر موجود احکامه کوره اشبو ضیاعلردن متولد کار بانقہ یه قالمق اقتضا ایدردی . حالبوکه بانقنوط نوعما بر کاغد پاره در . پاره دن استفاده ایتک حتی منحصرراً دولتکدر . بانقہ نک هیچ بر عوض مقابلی اولقسزین بویله آچیقدن بر کاره حق اولماق لازم کلیر . ایش ائتلافنامه نک بو ماده سی صریحاً بو حق دولته تخصیص ایتدکددر .

بانقنوطده بانقہ لهنده قبول اولنان تعدیلاته کلنجه :

۱ — امتیاز نامه اساسی موجبجه بانقہ قاصه سنده موقع تداولده بولونان بانقنوطلرینی ابرازنده تأدییه مجبور اولدینی حالده ۲۱ تموز ۳۳۰ تاریخلی قانون اشبو شرط داخلنده اخراج ایدلش اولان بانقنوطلره تداول مجبوری صلاحیتی بخش ایتشدی . ائتلافنامه بو صورتله تداول مجبوری صلاحیتی حائر اولان بانقنوطلرک مقاوله نارینخنده کی مقدارینی ۸۹۱۴۸۵ لیرا اولارق تثبیت ایتش وبونلرک تداول مجبوری صلاحیتی تأکید ایدلش در . آنحق ثلث تأمینات نقدیه محافظه سی شرطی باقیدر . بوصورتله بانقہ نک بونلری نقداً تأدییه ایدرک میدان تداولدن چکمک مجبورتی تأجیل ایدلش اولمقده در .

۲ — بانقہ یکیدن بانقنوط اخراج ایتک صلاحیتی استعمال ایتدیکی تقدیرده یکی چیقاره جنی بانقنوطلر ابرازنده آلتونله تأدییه ایدلمک مشروطدر . مع مافیه بونک ایچون بولندیره جنی ثلث آنکه سک نصفنک عیناً آلتون ونصف دیکرینک مالیه وکیلک موافقتیه

تورك ويا اجنبى دولت اسهام و تحويلاتى اولابيلمه سى قبول ايدلمشدر . آنجق بو اسهام و تحويلاتك صوك آلتى آيلق فيئات وسطيسى آلتونله باش اوله جق و قيمته بر نقصان عارض اولدينى تقديرده در حال اكمل ايديله جكدرد . بو قيد ايله بانقه بر طرفدن يكيدن فائضسز پاره تدارك ايدم بيلمك صلاحيتنى ادامه ايتمكده اولدينى كېي ديكر طرفدن قاصه سنده غير مئمر بر صورتده طوته جنى پاره نك نصفنى كنديسنه فائض كتيره جك اولان اسهام و تحويلاته ياتيرمق امكاننه مالك اولمقده در . بو قيمتلك غايت امين اولماسنى تأميناً ماله و كيلنك موافقتى شرط ايدلمشدر . آريجه تأمينات تماماً آلتون اولدينى تقديرده بانقنوطلر اوزرندن دولته ويريله جك عائداتك مجموع تداولك ايكي ثلثى و نصفاً آلتون نصفاً اسهام اولدينى تقديرده بش سدس اوزرندن حساب ايدلمه سى قبول ايدلمشدر . بوده بانقنهك كوچك بر منفعت ايچون قاصه سنده كى آلتون مقدارينى تنقيص ايتمه سى ميلاتى تحديد ايتك ايچوندر .

مع مافيه فكر مزجه يكي بانقنوط اخراجى حقنده كرك دولت و كرك بانقه لهنه وضع اولان احكامك بوكونكى حالده بر قيمت عمليه سى يوقدر .

بانقنوط ، حال حاضرده كى شرائط نقديه داخلنده ، كاغد پاره يه قارشى يوزده يوزدن فضله آريم ياديني ايچون نقد رولنى ايفا ايدم مز . يعنى بانقنوطك بوكونكى شرائط داخلنده كاغد پاره ايله متوازيأ تداول ايتمه سنك امكانى يوقدر . بوكون بانقنوط بر بوره قيمتى حاله كمشدر . بونك ايچون بانقه اسقنوطو معاملاتى بانقنوطله يابهرق يعنى بر كاغد ليرا مقابلنده ويره رك بالاخره اونلرى ختام امتيازده آلتونله مبادله ايتك تهلكه سنى كوزه آلاماز . بالعكس انه كچدكجه بانقنهك ميدان تداولده كى بانقنوطلرى بيله چكوب امتياز ختامنده بونلرى آلتونله تأديه ايتك تهلكه سندن قورتارمغه چاليشدينى بانقنهك بيلانچوسنك سطحى بر معاينه سندن آكلاشيلير . نته كيم كچن سنه ميدان تداولده اولان ۸۹۱ بيك ليرا بانقنوطه مقابل بانقنهك بوسنهك آلتى آيلق بيلانچوسى بومقدارك ۸۵۰ بيك ليرا جوارنده اولدينى كوسترمكده در .

بانقنوطك بو وضعيتى هر حالده مملكت لهنه عد اولنه ماز . معلومدر كه بانقنوط اعتبار تجارينك توسعك اك اساسلى بر واسطه سيدر . بانقه بو بانقنوط سايه سنده تجاره قارشى آجدينى قره دينك ، اسقنوطونك ، ساحه سنى توسيع ايدر ؛ عندالاحاجه پورتفويلرينى عثمانلى بانقه سنه دور ايتك امكانى ديكر بانقنهركده اعتبارده ده جصور داورانماسنى استلزام

ایتدیرر و بواعتبار مانیوہ لاسی سایہ سندنہ مملکت بویوک براستحصال قوتی قازانمش اولور .
 کوریلور کہ وضعیت حاضرہ داخلندہ امتیازی بانقہ نک بانقہ نوط سیستمی نہ کنڈیسی
 ایچین ، نہ مالہ ایچین ونہدہ مملکت حسابنہ ہیچ بر فائدہ نی منتج اولما مقدرہ . بو وضعیت
 بو صورتلہ دوامی مملکتک استقبال اقتصادی نامنہ ہیچدہ شایان تمنی دکلدر . بناء علیہ
 حقیق صورتدہ بانقہ نوط چیقارہ جق بر بانقہ یہ احتیاج مطلق واردر . بونک تحققی ایدہ .
 بیلمہ سی ایچین کاغذ پارہ و بانقہ نوط ایکیلکنک ازالہ ایدلسی ایجاب ایدر . بوہ کاغذ
 پارانک بوکون بتون آوروپادہ اولدینی کی بر بانقہ طرفدن بانقہ نوط شکندہ چیقارلسی
 ایلہ ممکن اولور . اصول نقدیلرینی اصلاح ایدن آلمانیا ، آوستریا و مجارستاندہ اولدینی کی
 قسماً آلتون ، قسماً اسہام و تحویلات و قسماً دہ بانقہ نک سندات جزو دانی تأمینات کوسترلک
 صورتیلہ بانقہ نوطک تزیید مقداری آنجق اوزمان موضوع بحث اولابیلر .

عثمانی بانقہ سی بوکونکی حالندہ یالکز اسماً حکومت بانقہ سی حالندہ قالدجہ ، دولتک
 بو بانقہ نک ادارہ سی اوزرنندہ کی مراقبہ سی غایت سطحی بولوندجہ وبالخاصہ بانقہ پارس
 قومیتہ لرندن آلدینی دیرہ کتورلرلہ ادارہ اولوندجہ حکومتک کاغذ پارہ نک اصلاحی
 و بانقہ نوط احداثی سیاستنی بانقہ نک الہ تودیع ایتکہ جسارت ایدہ مہمہ منی غایت مدبرانہ
 بر حرکت اولمق اوزرہ تلقی ایتک ایجاب ایدر .

دیگر طرفدن بانقہ نک دولتلہ اولان مناسبات مالیہ سی دہ صوک درجہ توسیعہ محتاجدر .
 کرچہ صوک مقالہ ایلہ حکومت بانقہ دن شرائط حاضرہ داخلندہ تأمین ممکن اولان
 منافع و خدماتک حد اعظمیسی تأمین ایتشدر . ۱۸۷۵ مقالہ سی و مذیلاتیلہ صوک
 استلافنامہ لرلہ یوقاریدہ ذکر ایدیلن اساسانہ سطحی بر نظر مقایسہ عطف ایتک بو بادیہ
 کفایت ایدر . بونکہ برابر بر دولت بانقہ سنک موقعی بو اولماق لازمدر . دولت بانقہ سی
 انکلتیرہ ، بلجیقا ، پروسیہ بانقہ لرندہ اولدینی کی دولتک بر خزینہ داری حالہ ارتقا
 ایتدیرمک ، بوتون معاملات مالہ دولتی یعنی وارداتک تمرکزینی ، معاملات نقدیہ نی ،
 مصارفک تأدیہ سی بو بانقہ یہ کوردیرمک لازمدر . بویلہ نازک بر معاملہ نی حکومتک تماماً
 اجنبی اللہ تودیع ایتہ سنک امکانی یوقدر .

ایشتہ بوتون بواسبابہ مبنی حکومت عثمانی بانقہ سنک امتیازی تجدید ایدر کن کنڈیسی
 تماماً باغلامق ایستہ مہمش ۲۱ مارت ۱۳۴۱ تاریخلی استلافنامہ نک ذیلک برنجی مادہ سیلہ
 مدت مقالہ ظرفندہ حکومتجہ بانقہ نوط اخراجہ مأذون اولمق اوزرہ بر تورک حکومت

بانقه سى تأسيس ايديله جك اولورسه بانقه نك بركونا اعتراض درميان ايده ميه جكي شرطى قبول ايتدير مشدر . آتجق بوتقديرده عثمانلى بانقه سنك حقوق امتيازيه سنه ده خلل كليله جك و ۱۹۳۵ سنه سنه قدر امتيازلى و بانقنوط اخراجنه ماذون ايكي بانقه نك متوازيآ مملكتده ياشاماسى لازم كله جكدرد .

بوايضاحات ايله عثمانلى بانقه سنك بوكونكى موقعى مملكتده يك صاغلام اولديعى تبين ايدرد . بوكونكى مقاولاته مستداً عثمانلى بانقه سى هيچ بر زمان حقيقى بر دولت بانقه سى رولنى كوره ميه جك ، دولته اولان مناسبات ماليه سى كسب توسع ايتيه جك ، بانقنوط امتيازندن ، اليوم موقع تداولده كي بايقنوطلردن ماعدا هيچ بر استفاده تايمين ايله ميه جكدرد . اكثر مملكتلرده امتيازلى دولت بانقه لر ينك مى سرمايه ايله تشكىل ايتديكى نظر دفته آله جق اولورسه زرده ده بويولده بر بانقه ميه احتياج اولدينى تظاهر ايدرد . بو بانقه حكومتك اك واسع شرائط دائره سنده بر قوتورولنه تابع طوتوله جق ، مملكتده كي بر مجلس اداره طرفندن اداره ايديله جك و عندالحاجه ، بر جوق مملكتلرده اولدينى كي ، دولتده بو مجلس اداره ده تمثيل ايديله جكدرد . بانقه بوشكالى آلدېنى زمان حكومت كنديسنه خزينه داراق رولنى اضافه ايتكمده تردد ايتيه جك ، وزنه عمومينك ، دفتر دارلرك ، مال مدير لر ينك بر جوق وظيفه لرى بايقه ميه انتقال ايدرك معاملات ماليه كسب بساطت و اونستده كسب انتظام ايله جكدرد . بونردن فضله اوله رق اوزمان دولت نقد سيسته نك اصلاحنه بانقه ميه بشريك ايدجك ، كاغد پاره بانقنوط شكنى آله جق و مملكتده بانقنوط منافعتدن حقيقه استفاده ايله مكه باشلايه جكدرد .

بويله بر مؤسسه نه قدر مى اللرده بولنه جق اولورسه غايه ميه اودرجه خدمت ايديله جكندن هيچ شبهه يوقدر . لكن بوبابده ايكي مهم نقصان قارشيسنده يز . ۱ ته كنيق فقدانى ، ۲ سرمايه فدانى . بو محدودلرك برنجيسى مديريت عموميه موقعنه ، بر مدت ايچين صاحب اختصاص ماليه جيلر ، معاونلر كتيرمك صورتيه ازاله ميه چاليشسق بيله ، ايكنجيسى ياقين بر زمانده قولايقله ازاله ميه امكان يوقدر . دولت بانقه سى ايچون اك آشاغى بوكونكى مقياس ايله ۲۰ - ۳۰ مليون ليرالق بر سرمايه لازمدر . بونى مملكتده قولايجه طوبلامق ممكن دكلدر . فقط مسئله يالكز بوسرمايه ميه بولقله ده قالماز . دولت بانقه سى مهم معاملات ماليه ميه كيريشه بيلمك ايچون محتاج اولدينى سرمايه ميه قولايجه تدارك ايدم بيله جك صورته سر - مايه دار غروپلرى اوزرينه استناد ايتك لازمدر . مملكتده ايسه تشكىل ايتمش بويله سرمايه دار

غروپلری ده موجود دکلدر . بونک ایچون بر چوق تشبثات نافعه مزده اولدینی کبی بو خصوصده ده بر مدت اجنبی سرمایہ سنک توسطنه محتاجر .

بو کونکی عثمانی بانقہ سی سرمایہ دارلری یکی تشکل ایده جک اولان بر حکومت بانقہ سنده اجنبی سرمایہ سی روالی ایفا ایتمه کک مساعد اولان بر موقعده در . مملکتده برلشمشدر ، بر چوق علاقہ سی وارددر . مملکتی ای طائیر بالخاصه تجارت محیطه مزه بویوک بر اعتماد تلقیننه موفق اولمشدر . خلق دیگر بانقہ لره فائض مقابلنده یامادینی تودیعیاتی عثمانی بانقہ سنه بلا فائض سوه سوه یامقده در . بوندن ماعدا عثمانی بانقہ سی غرب سرمایہ سیله مملکتی اک ای بر صورتده اتصال ایتدیره جک بر مؤسسده در . بو بانقہ تورک واجنبی سرمایہ سنندن مرکب بر مؤسسسه حاله قونه جق ، بو کونکی کبی خیالی بر مجلس اداره طرفندن دکل مملکتده مقیم خارجدن دیره کتیو آلیان و صرف ایجابات اقتصادیه ذاتوا سنده حرکت ایدن بر مجلس اداره طرفندن اداره ایدیه جک اولورسه اوزمان یکی تشکل ایده جک اولان بانقہ حقیقی بر دولت بانقہ سی حاله کلیر . شه سز بو غایه واصل اولوق اویله کاغد اوزرنده یازلدینی قدر قولای برشی دکلدر . هرا یکی طرفی تأمین ایده جک بر صورت حل بولوق لازمدر . بونک امکانش اولمدیغنه قانعز . هر حاله عثمانی بانقہ سنک استقبالی بوشکلده بر ائتلافه باغلیدر . بو ائتلافه عقد اولدینی کون بانقہ تاریخک کندیسنه بر یادکاری اولان « عثمانی » عنوانندن ده قورتولاروق بر « تورکیه بانقہ سی » نامی آلمش اوله جقددر .

اقتصاد مدرسی

ابراهیم فاضل